


Irango militarrek alerta egoeran, erreformisten altxamenduen beldur

Iraultzaren Zaindarien neurriak hartu dituzte Khameneiren aginduz

Agentziak / Teheran

Azken egunotako neurri murriztaileek Irango erreformisten altxamendua eragingo duen beldur dira agintari kontserbadoreak, eta badaezpada, Iraultzaren Zainda-

riak —Armadak baino botere gehiago duen erakunde militar berezia— alerta egoeran jarri ditu Ali Khamenei *ayatola* buruzagi nagusiak. Hala ere, milaka lagun atera dira kalera, komunikabide erreformisten alde protestatzera.



HENGHAMEH FAHIMI / EPA

Ikasle talde bat, Teheranen, komunikabide erreformistak ixtearen aurka protestan.

KONTSERBADORE eta erreformisten arteko botere borrokaren ondorioz, Irango giro politikoa gori-gori dago, eta hortaz ohartuta, Iraultzaren Zaindariai alerta egoeran jarri ditu Ali Khamenei buruzagi nagusiak.

Izan ere, azken egunotan erreformisten kontrako neurri oztopatzaileak hartu dituzte kontserbadoreen menpe dauden erakundeek —igandeaz geroztik haien aldeko 13 komunikabide itxi dituzte eta bost kazetari atxilotu—, eta herritarrek oldartuko diren beldur dira. Teheran hiriburuan eta beste hainbat hiritan milaka lagun —batez ere ikasleak— atera dira kalera egunotan, itxieren kontra protestatzera.

Irango egitura instituzionala oso berezia da, eta horrek berak nahaspilatu egiten du giro politikoa. Gobernua eta Legebiltzarra daude batetik: bozketa libre eta unibertsalez aukeratzen dira, eta erreformistek dute bietan gehiengoa. Baina erakunde bi horien gainetik Buruzagi Nagusia —agintari politiko eta erlijioso nagusia— eta hark izendatutako Zaindarien Batzordea daude. Kontserbadoreen menpe daude bi erakunde nagusi horiek.

Iraultzaren Zaindariai ere —gorputz militar berezi bat da— Ali Khamenei buruzagi nagusiaren menpe daude, eta Armadak baino botere gehiago dauka.

Khatamiren anaiari oharra

Kontserbadoreek 1979ko Iraultza Islamikoaren ostean sortutako estatu islamista

zurrunarekin jarraitu nahi dute, eta erreformistak, berriz, eredu malguago baten alde borrokatzen dira.

Igandeaz geroztik, 16 komunikabide erreformistetatik 13 itxi dituzte, «Islama iraintzeagatik».

Ildo horretatik, Mohammad Khatami gobernuburu erreformistaren anaiari, Reza Khatamiri, berak zuzentzen duen *Mosherat* egunkaria ixteko mehatxua egin dio Zaindarien Batzordeak. Egunkari horixe da Khatamitarren aldeko erreformisten komunikabide nagusia.

Bigarren itzulia maiatzaren 5ean

IRANGO Legebiltzarrera-ko hauteskundeak bigarren itzulia maiatzaren 5ean egingo da, gorabehera batzuen ondoren, hala hitzartu baitute azkenean Barne Ministerioak —erreformisten esku— eta Zaindarien Batzordeak —kontserbadoreen menpekoa—.

Aurreneko itzulia otsailaren 18an egin zen, eta

Barne Ministerioko emaitzen arabera, erreformistek garaipen argia lortu zuten. Hala ere, 52 barrutako diputatuak oraindik erabaki gabe daude, aurreneko itzulian hautagaietako inork ez zuelako lortu botoen %25.

Horrez gain, hainbat tokitan erreformisten garaipena baliogabetu du Zaindarien Batzordeak.

laburrean

K U B A - E E B B

■ Elían Gonzalezen lehengusu bat eta irakasle bat Washingtonera bidean dira, «egokitzen laguntzeko»

JUAN MIGUEL GONZALEZ haur baltsero kubatarren aitak eskatu bezala, Elían semearen lehengusu bat eta aurreneko irakaslea Washingtonera bidean dira, umeari lehengo bizimodura itzultzen laguntzeko. Yasmani Betancourt Valentin 10 urteko lehengusuak eta Agueda Cecilia Fleitas Miranda irakasleak atzo hartu zuten Mexikorako hegazkina gero handik beste batean Washingtonera joateko. Elían Gonzalez 6 urteko mutikoa borroka politiko bateko ardatz bihurtu da, amarekin Kubatik baltsa batean Miamira ihesi irten, ontzia hondoratu, ama galdu eta eta bera bizirik atera ostean. Haren Miamiko senideek EEBBetan geratzea nahi dute, eta aitak Kubara itzultzea. Epaitegiaren erabakiaren zain, Kubako adiskide eta adituen laguntza jasoko du berriro bere familian txertatzeko.

K O L O N B I A


■ Bakerako goi komisionatuak dimititu egin du, eta Pastranak ordezkia izendatu du

VICTOR G. RICARDO Kolonbiako Bakerako Goi Komisionatuak dimititu egin zuen atzo. Andres Pastrana lehendakariak berehala izendatu zuen ordezkia: bere idazkari pribatu Camilo Gomez. Ricardo bakerako goi komisionatua zen 1998ko abuztutik. Pastranak orduan hartu zuen lehendakari kargua, eta bake prozesua hasi zuen FARC Indar Armatu Iraultzaile Kolonbiarrekin.

F I L I P I N A K

■ 'Robot komandantea' Malaysiako bahiketaren buru

ORLANDO MERCADO Filipinetako Defentsa ministroak atzo emandako azalpenen arabera, Abu Sayyaf gerrilla islamistako buruzagietako batek egin du Malaysiako bahiketa handia, Ghalib Andang *Robot komandantea*. Igandean 21 lagun bahitu zituzten Malaysiako Sipadan uhartean —haietako 11 turista atzerritarrak— eta gero Filipinetara eraman. Polizia Filipinetako hegoaldean gerrillarien atzetik dabilela azpimarratu zuen Mercadok.



INACIO TEIXEIRA / AP

Brasilgo Elizak barkamena eskatu die indiar eta beltzei.

Portugalek duela 500 urte «aurkitu» zuen Brasil, eta urteurren horren kariatz barkamena eskatu die Eliza Katolikoak indiar eta beltzei. Jayme Chemello Brasilgo gotzainen buruak esan zuenez, Elizak bekatuak egin ditu indiar eta beltzen aurka. 100.000 lagunengatik aurrean eman zuen meza Chemellok, indiarren herrixka batean.